

LEI SÒCI DE L'ARMANA

FELIPO MABILLY

(JAQUE LOU SÒCI)

Lou Temp deis Armana

La boueno salud à l'*Armana Marsihès* que, per la desièmo anado, fa babouou à l'estalagi dei librarié.

Li pescan dintre aquesto tiero de vers de **Jaque lou sòci**, un descaladaire de boueno grano

LA CREIDADISSO DOOU PAOURUN

Lei Machino

Lou genio dei descouberto
Es dins uno salo duberto
De tout caire, aou trefoun dei ceou,
Souto d'un pàli senso tanco
Qu'es d'uno estofo bloundo e blanco
Facho emé de rai de souleou.
De temps en temps aqueou genio
Pren de soun être de cenio
E lei mando din lou cerveou
Deis ome, qu'après quaouquei vèio
Muton la cenio en idèio
Que deven un ooutis nouveou:
Uno serpeto, un barro-mino,

Marteou, rabot, tranchié, machino,
Caoudiero, pistoun de pressien,
Poumpo vo serro mecanico,
Fanaou e vaturo eleitrico,
Cado cenio, enfin, aduech uno invencien.
Aqueou genio que s'escounde
Desempuei que lou mounde es mounde
Deis uei de la curieousita,
Un jour, doou peïs dei tounerro,
D'un vanc vengué prochi la terro
Per regarda l'umanita.
Alor, li pico din l'aouriho
De vousas remplido de furio,
De brut, de cris e de plagnun:
Es dei travaiaire la ràgi,
Doou pople que peno à l'oubràgi
Vejant de soun couar l'amarun.